

Üna dumanda dal temp

Las bes-chas rapazas grandas sun da retuorn in Engiadina: üna trapla fotografica ho fat in avrigl ün purtret d'ün luf tscharver ed in meg s'ho chatto stizis d'ün uors – tuots duos in Engiadina Bassa. Eir singuls lufs sun in gir in Engiadina, quels nu s'haun però aucha multiplichos illa valdeda otalpina al cunfin dal chantun. Ma in avegnir as ho eir da fer quint cun tröps da lufs i'l's contuorns engiadinais.

MARTIN CAMICHEL/FMR

Dal 2011 s'ho furmo ün périn da lufs al Calanda chi s'ho alura multiplicho ün an pü tard. Que's trattaiva dal prüm tröp da lufs in Svizra daspö 150 ans. Ils lufs dal Calanda scu eir ils lufs in Surselva daun adüna darcho da discorrer, da lufs in Engiadina as oda però relativmaing poch. «Illa regiun dal Pass dal Fuorn es pü u main daspö ses ans d'ntuorn ün luf. Ma que nun ho aucha më do üna furmaziun d'ün tröp, adonta chi sun stos ulteriurs singuls lufs in Engiadina», declara Arno Puorger, collavuratur scientific per bes-chas rapazas grandas tar l'Uffizi da chatscha e pescha chantunel.

Püs lufs in gir

«Id es clerischem, cha sun püs lufs in Engiadina. Ma l'Engiadina es aucha ün pô inavous cun la colonisaziun dal luf in conguel cun otras regiuns dal chantun», disch Arno Puorger. Uschë s'ho vis ün luf illa regiun da la Plaiv, intuorn il Parc Naziunel, scu eir a Segl. In Engiadina Bassa ho que l'an passo eir do s-charps da lufs. Tenor Arno Puorger nu vain neir scuviert mincha luf ch'ido es in Engiadina. Uschë ho be güst d'ncuort s-charpo ün luf üna bescha ad Ardez – quel luf nu d'eira però gnieu vis ouravaunt. Que saja tipic per la bes-cha rapaza granda da fer grandas distanzas, uschë il collavuratur scientific. «Que po esser ch'el passa be tres l'Engiadina u ch'el resta per ün pêr evnas». L'Engiadina es tenor Arno Puorger tuottuna eir ün lö attractiv pels lufs, que nun es dimena ün motiv ch'el nu s'ho aucha coloniso cò.

D'inuonder derivan ils lufs?

Il luf nu riva scu l'uors dal Trentino, tenor Arno Puorger arriva'l pütest dal vest u dal nord. Uschë as tratta que tal luf sül Pass dal Fuorn d'üna figlia dal tröp dal Calanda. Que s'ho pudieu sclerir a maun da la genetica. Arno Puorger declera: «Il pü grand squitsch vain dal Grischun Centrel, da la Surselva, dal Vallais e dal Tessin.»

Dal 2020 d'eira ün luf in gir i'l's contuorns da Puntraschigna. A maun d'üna analisa dals excrements s'ho pudieu sclerir la genetica – il



Üna trapla fotografica dal Parc Naziunel Svizer vaiva scuviert quist luf dal 2019.

FOTO MAD

luf d'eira d'üna populaziun dal Balcan. «Quel d'eira gnieu ün pér tschient kilometers fin in Engiadina. Que voul dir ch'els paun propi gnir da dapertuo», disch Arno Puorger.

D'un ulterior luf, chi sto uossa i'l Partenz, s'ho eir pudieu sclerir la genetica e quel deriva oriundamaing da la Germania dal Nord. «Que nu's po dir chi vegnan be d'üna vart, ma la granda part riva dal vest u nordvest».

Pochs lufs residents

Causa cha l'Engiadina nun ho aucha bgers lufs residents – fin uossa as ho cugnuschen-tscha d'ün luf chi viva sül Pass dal Fuorn – nun ho que aucha de gronds disgusts in connex cun la bes-cha rapaza granda. «Ma forsa già prosmo sted as fuormaro ün tröp ed alura daro que ils listess conflicts scu sülla Surselva ed in otras regiuns, inua cha lufs s'haun multiplichos», disch Arno Puorger.

Tenor il collavuratur scientific nun ho il luf temma da l'umaun, ma el svia bainschi oura ed ho respet da l'umaun. «Scha's vezza ün luf – que po esser eir sün cuorta distanza – es que da reser calm. Pelplü vaune alura eir davent. Scha

na, as dess as der da badair, per exaimpel cun splatter i'l's mauns.»

Annunzcher a l'uffizi

Scha's vezza ün luf, alura es l'Uffizi da chatscha e pes-cha fich cuntant, scha's annunzcha que tal guardgia chatscha respunsabel. Impü as po visiter la pagina d'interent da l'uffizi, inua cha's chatta üna carta interactiva cun tuot las scuviertas da bes-chas rapazas grandas sül territòri grischun. Sün quista charta as vezza ch'el luf es intaut in gir traunter il Calanda in direzioni Surselva, Grischun Centrel ed in direzioni Tessin, dimena in quasi tuot il Grischun. Be l'Engiadina nun ho aucha uschë bgeras scuviertas dal luf cu otras regiuns in Grischun. Ma scu cha Arno Purger ho manzuno «que es be üna dumanda dal temp».



Via quist code as po visiter la charta interactiva cun tuot las scuviertas da bes-chas rapazas grandas sül territòri grischun.

La Chalavaina es darcheu averta

Dürant quatter mais d'eira serrà l'Hotel Chasa Chalavaina a Müstair. Il motiv d'eiran renovaziuns a l'intern. Dürant quellas renovaziuns esa impustüt gnü miss pais da mantgnair la substanza istorica. Uossa driva el darcheu sias portas.

ANDRI NETZER/FMR

Daspö bundant 770 ons sta l'Hotel Chasa Chalavaina – dal rest il püi vegli hotel da la Sviza – in Platz Grond a Müstair in posizion prominenta güst in fatscha da la clostra San Jon. Davo 50 ons vaiva tscherchà l'on passà il proprietari ed anterius osp, Jon Baptista Fasser (81) ad üna successura o ad ün successur. Per cumprar l'hotel s'han in seguir miss insemla i's responsablos dal Patrimoni cultural mundial da l'UNESCO Clostra San Jon e fundà la Fundaziun Chasa Chalavaina (La FMR vaiva rapportà). Dürant ils ultims quatter mais d'eira l'hotel serrà per far renovaziuns a l'intern. Uossa driva el darcheu.

Mantgnair il caracter da la chasa

Ün dals bôts da la Fundaziun Chasa Chalavaina es tanter oter da mantgnair il caratter original da l'hotel. Perquai sun gnüdas fattas be ligeras renovaziuns a l'intern – uschë sun per exaimpel gnüts glimats giò illas stanzas ed illas stüvas da lain ils fuonds e las intabladüras, i'l's pier-tans es per part gnüda rendüda visible la reboccadüra istorica ed üna o tschella paraid ha surgiu üna nouva liadüra cun chaltschina fatta svessa. Fin a pacas excepziuns sun eir tuot las stanzas adüna

amo drizzadas aint culla veglia mobiglia. Minchüna da quellas 18 stanzas es ün unicum, ha seis agen caratter e perfin seis agen nom – uschë stan scrit vi da las portas noms sco «La stanza dal preir», «L'ab-dessa» o «Il butschin da diogenes».

S-chaffir ün fil cotschen

El es impustüt fich cuntant ch'el ha pudü realisar in l'Hotel Chasa Chalavaina eir sias aignas ideas: «Minchün ha seis gust, ma eu craj cha nus hajan pudü

s-chaffir ün fil cotschen chi's tira tras la chasa.» Il nouv uster da la Chalavaina nun es però hotelier. Insè es Uli Veith econom ed oriund dal Vnuost. Dürant bod desch ons es el stat president cumünal da Mals – il grond cumün politik dadour il cunfin da Müstair. Daspö il 2015 es el mainagestiu da la Fundaziun Pro Clostra Son Jon. «Eu n'ha fingjà badà sco

president cumünal ch'eu lavur gugent cun umans, perquai m'haja tantà da surtour eir quista sfida», disch Uli Veith ed agiundscha cha l'Hotel Chasa Chalavaina til haja adüna fingjà fascinà. Sco hotelier metta el impüstürt pais a la dürabilità e prodots regionals. Uschë as chatta in l'intern per exaimpel tapets fats da la Tessanda a Sta. Maria e savun da Soglio, i'l restaurat vegnan servits vins da la Val Poschiavo e charn da la Val Müstair.

Ils prossems ons saran üna sfida

Sco cha Uli Veith disch plünavant, dess l'Hotel Chasa Chalavaina attrar impüstürt giasts chi tscherchan la quietezza e chi predschian il stil da la chasa. El agiundscha: «L'hotel es però eir adattà per sportistas e sportists chi vegnan in Val Müstair – saja d'instà per ir cul velo o d'inviern per ir cul skis.» Ch'ultra da quai possan els uossa eir spordscher allogi a las scienciadas e scienciatas chi vegnan illa clostra San Jon per far dietas. Ellas ed els han stuvü infin uossa adüna gnir sparpagliats in hotels in tuot la val.

Eir scha'l prossems ons saran tenor Uli Veith üna sfida per la gestiun, guarda il cumanzamaint fingjà oura bain: «Vi per l'eivna esa intant amo quiet, ma las fins d'eivnas da las prosmas quatter eivnas eschna cumplettamaing occupats.»



Davo quatter mais da discreta renovaziun as preschainta l'Hotel Chasa Chalavaina sco avant la vendita.



FOTOS ANDRI NETZER

VAL MÜSTAIR



L'exposiziun d'art «last exit eden».

FOTO MAD

Terz ed ultim «last exit eden»

Dals 3 da gün fin als 22 d'octobre 2022 ha lö a Sta. Maria in Val Müstair l'exposiziun d'art «last exit eden». Quai scriva l'organisatura «Art Val Müstair» in üna comunicaziun a las medias. Sco ch'ella scriva plünavant as tratta da la terz'ed ultima ediziun.

Sco fingiä dûrant las ultimas ediziuns da «last exit eden» vengnan muossadas eir ingon darcheu in differents lös a Sta. Maria ouvras d'artistas e d'artistas svizzers chi sun stats ün temp plü lung in Val Müstair obain chi vivan là. In lur art refleettan ellas ed els l'idea fundamental da Parc da natura Biosfera Val Müstair e dal Reservat Engiadina-Val Müstair da l'UNESCO. (cdm/fmr)

Ulteriuras info-mazioni davart il program detaglià da l'exposiziun «last exit eden» as chatta aint la rait suot: artv.m.ch

MÜSTAIR



Las muongias da la clostra a Müstair han vendü diversas erbas e plantas da lur üert.

FOTO ANDRI NETZER

Vendü plantinas da la clostra

In marcurdi, ils 1. da gün 2022 ha gnü lö davant la butia da la clostra a Müstair ün marchà da plantinas. Las muongias da la clostra San Jon han vendü dûrant il di diversas plantinas, erbas e flours. Tuot las plantas vendüdas d'eiran gnüdas cultivadas aint il üert da la clostra. (fmr/an)